



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim




tir yimyim

TAPAK 8

Trump-i Venezuela nung CIA
nem temelaba agütsüogo

Frenkie De Jong-i Barca den
tenangzüktepba yanglushiogo



VOL. XXIII ISSUE NO. 10 (ADOK 10) DIMAPUR ROGONÜ (FRIDAY) MONGPUTENI (OCTOBER) 17, 2025

₹ 5.00

JCC-i pen-down strike mapang telatet makai alitsü sangdong

Dimapur, Mongputeni/Oct. 16 (TYO): CANSSEA, FONSESA, NIDA, NSSA, aser NF&ASA lungjemer tentetba Joint Coordination Committee (JCC) on IAS Induction ajanga tang telidak pen-down strike ya October 17 alema tarutsü nung sangdong ka magütsü tashi atsülangtsü telemtetba agiogo.

Brehostibarnü sangdong ka agütsüba nung, tang telidak anogo asem longkak aitba tensa reprangshima aser non-SCS IAS induction inyakyim nung ochi mapa meinyakba anema longkak aitba dak sendakba tensa asadanger iba telemtetba ya agi, ta Committee ajanga ashi.

All Nagaland School Teachers' Association (ANSTA) nungi temepishiba ka aruba aser kaketshir ajungtsü mechi iba strike küboki tesayur aser kaket reju maittsü, ta JCC ajanga sangdong.

Merit nung ajemdaker nübu shimba yimya wazüka ayutsü asoshi tesayurtemi maneni nokdakba asoshi pelar ta committee-i ashi.

Associations, lokti tentet aser kija-i süshia, yimjak nung aser miimshia yaritepba atema pelaba lemsatetpang, iba longkak aitba ya sorkar inyakyim nung ochi wazüka ayutsü asoshi mapa tajung ka lir ta JCC ajanga ashi.

Nüburtemi timtem balala ajangshia alitsü, saka ajaki angatetsü aser aremzüksü ayongzüker, kechiaser ibai ochi aser tajung nung system amendakba senmang tarutsü putu temi amangtsü asoshi iba movement ya tenzüka lir.

Tarutsü nung totuyuba ka magütsü tashi iba pen-down strike atema taoba mapang sangdong agüja aliba ajak kasa alitsü, ta JCC sangdong ajangasa ashi.

Sorkari Reservation Review Commission shimshiogo

Kohima, Mongputeni/Oct. 16 (TYO): Tribal bodies temi takhangba tasen agütsüba sülen State indang reservation policy reprangshitsü nungloksüba committee shimshiogo.

Committee tasenba ya sorkar ketdangsur tain kati anitsü aser nungja Reservation Review Committee ta melentsüogo, ta Nagaland sorkar indang odongtar aser Minister, K.G. Kenye-i Kohima nung cabinet senden amenba sülen osangbener den jembidang ashi.

Taoba mapang committee nung kin mesüra 'block-wise representatives' dena liasü, saka 5-tribes Committee on Review of Reservation Policy (CoRRP) temulung machiba sülen senior government officials inoksem aser nungja Commission for Review of Reservation ta melentsü, ta pai ashi.

"Kin pongu - Ao, Angami,

Lotha, Rengma aser Sumi - ajanga tesüsa memorandum agütsüba nung kin mesüra block-wise representatives malitsü saka senior government officials kisüing agi melentsüla ta ashiba sülen onoki aji melenshiogo," ta Kenye-i ashi.

Tang tentetshiba committee nungya taoba Development Commissioner, R. Ramakrishna tekolak asütsü aser ex-officio member nungya Department of Personnel and Administrative Reforms (P&AR), Law and Justice Department aser Home Commissioner's Office nungi senior officers alitsü aser Commissioner & Secretary, P&AR ya Member Secretary ama inyaksü, ta pai metetdaksü.

Nübu shimer ita trok tsüngta iba review renemer sorkar nem recommendations agütsütsü aser tatem nungbo ibai tang tagidak National Census Exercise den ajuruteptsü, ta pai ashi.

Dimapur Railway Station upgrade asüba 2028 nung renemtsü: NFR



October 14, 2025 nü Maligaon, Guwahati nung Northeast nungi MPs tem den senden ka amendang tangokba noksa nung MP (Lok Sabha) S Supongmeren Jamir-i o jempiba angur.

Dimapur, Mongputeni/Oct. 16

(TYO): Dimapur Railway Station upgrade asüba maparen tenzükogo aser June 30, 2028 tashinung renemtsü imlar, ta Northeast Frontier Railway (NFR) ajanga October 14, 2025 nü Maligaon, Guwahati nung senden ka amenba mapang metetdaksü.

Iba senden nung Nagaland nungi Member of Parliament (Lok Sabha) S Supongmeren Jamir aden, kong region nung tang teinyakdak railway projects tem reprangshimtsü atema danga north-eastern states tem nungi MPs tem dena liasü.

MP S Supongmeren Jamir indang office ajanga Brehistibarnü sangdong ka nung ashiba agi, Dimapur station indang RCC aser steel structures atema Master Plan and Design Basis Report agizükogo ta NFR ketdangsur temi iba senden nung shia liasü.

Ajisüaka station telungzüker nung dokan, ki, dhabas aser

temples densema temelaba makai ali agiba ajanga terenlok maparen nung tetsükdaksü ajuruba indang ketdangsur temi lemsatetba liasü.

Railway ketdangsur temi state sorkar dang iba maparen mapang shidak nung renemtsü asoshi mangatetep bentettsüba nung shilem agitsü ayongzüka liasü.

Iba senden nung Railway Board ajanga December 2026 tashinung commission asütsü nükjidong aliba Molvom-Pherima railway section (14.09 km) aser December 2028 tashinung renemtsü imla aliba Pherima-Zubza stretch (36.79 km) indang osanga lemsatetba liasü.

NFR ajanga Shokhuvi aser Molvom stations nung terenlok mapa ajak renemtsü ta ashi.

Mokokchung district kübok Tuli station nungi passenger train services tenzüksüba indanga iba senden nung jembia liasü aser Amguri-Tuli section nung operations tenzüksü asoshi nungdakba groundwork

jangjatepa liasü.

Tesendaktep agi anüngba tebilemstü lemsatetpang MP Supongmeren Jamir-i Railway ketdangsurtem dang Dimapur-Tizit railway line yanglutsü asoshi bilemdangtsü aser Dimapur nungi Niuland ajanga Wokha district nung Bhandari tashi foothill security railway route atema lenmang sadema ali-mali asadangtsü mepishia liasü.

Pa NFR dang tang Dimapur aser Guwahati tsüngta mesenzüi anendakoker aliba Nagaland Express (anepdang 6:00 ako nung) tanaben senzüdaksütsü aser Dimapur station nung Automatic Ticket Vending Machines (ATVMs) amenoktsü ajungshia liasü.

Iba den külemi Nagaland MP ajanga ketdangsurtem dang ochishia aser ajak nem maongka sako agütsütsü mechi state ajunga nung railway employment indang sangdongtsü ayongzüka liasü.

ENPO-i akhangba nung Centre-i Article 371A nung mokongshir

Kohima, Mongputeni/Oct. 16 (TYO): Central sorkar aser Eastern Nagaland People's Organisation (ENPO) tsüngta jembishinüba nung maneni terenlok lir, aser state sorkari Frontier Nagaland Territory Authority (FNTA) nung terenlok tasen aliba jangjatsüogo aser Constitution indang Article 371A nung mokongshir ta ashi.

Nagaland Chief Minister Dr. Neiphiu Rio-i anir Brehostibarnü cabinet senden amenba indang osangbener den jembidang, Centre-i ENPO den aiben jembishinü kaogo aser tesüsa Dimapur nung September ita tetenzüklen amen, ta Nagaland sorkar indang odongtar aser Minister, Power & Parliamentary Affairs, K. G. Kenye-i metetdaksü.

ENPO-i akhangba dak sendakba onük kar nung tangatetba lemsateptsü ashiba

sülen State sorkari Centre den tebilemba lemsatetpogo, saka tesem kar nung ano shisadangtsü nüngdaker, ta Kenye-i ashi.

Item ken o tejangja jembia bentettsü atema Department of Personnel and Administrative Reforms (P&AR) ajanga ENPO ketdangsur den tangatetep nung subcommittee ka tentetogo.

"Ibaji terenlok tasenbaji lir, aser ibaji ajanga iba ken o nung terenlok makai soita aliba bentettsü imlar," ta pai ashi.

Kenye-i tejangja mashi saka FNTA indang Executive Council agentsü aser iba melen 'administrative arrangements' kar anepalutsü indang jembitsü dena aliba ama ashi.

"Yamaji ataloka dissolve süra, shibai ketdang asütsü? Itemji jembishinüba mapang lir," ta pai rateta ashi.

Ano senotsü agütsüba yimya

aser administrative framework kübok cadre appointments indang onüktema dena lir ta pai ashi.

"Item yabo ken o tila lir, aser maneni shisa lemsatetba jembishinüba ajanga mapang nung bentettsü," ta Kenye-i ashi.

FNTA atema Article 371A kübok constitutional provision balaka alitsüba indang asüngdang dang, iba indang tanü senden nunga jembioigo ta langzü.

"Hao, iba indang tanüa jembioigo. Züngsem temi iba indang tebilemstü lemsatetba liasü," ta pai ashi.

New Delhi-i aortemrongnung pa medenaka, CM Dr. Rio, Deputy Chief Minister ana aser ENPO region nung legislature kar ao aser Article 371A nung amendment malitsü ta Centre nungi tejangja osang agüja liasü, ta Kenye-i ashi.

"Centre-i 371A yanglushitsü tebilemba mali. Iba melen parnoki chapter temeja ka ang alitsü sentong lir, koba ordinance mesüra State Act ka ajanga yanglutsü, koba ajanga 371A tawabangba küboki maitba tem nung nüngdakba temelenshi alitsü," ta pai jangjatsü.

"Komarka asüyonga ibai Parliament dangi meyipa maotsü. Ibaji tejangja shiogo," ta pai ashi.

Tekeraba nung tangatetep kati arutsü State aser Central sorkar tejangraba lir, ta ashi.

"Ajak kanga junga tejakleni otar, aser Centre-i temulung agüja mapa kuma inyaksü imlar," ta pai ashi.

Mon, Tuensang, Longleng, Kiphire, Noklak aser Shamator district nung kin ti tenüng nung ENPO yagi 2010 küm nungi state balaka meshia arur aser 1963 küm Nagaland kumtetba sülen

ketdangtsüba tsütsü aser terenlok tsütsüa senzüka yutsür ta ashir.

Parnoki akhangba nung nungmesoa ENPO-i Lok Sabha elections nunga shilem magi aser taoba küm state indang urban local body polls nunga shilem magi.

Ajisüaka April 30 nü ENPO ajanga state balaka akhangba khen asoshi anena atar aser Centre-i FNTA framework kübok autonomy tesem kar atema Centre-i agütsüba mulunga agizüker ta sangdonga liasü.

ENPO-i FNTA arrangement ya küm ter sülen lepa reprangshitsüla aser tanüngba ken o ya democratic aser political yimya nung bentettsü ta ashi.

Senotsü, legislative aser executive autonomu tejangja melira agreement kecha nunga meyongnem magütsütsü ta ENPO ajang-ajanga nokdaka lir.

FAC nung 5buba Thinking Hat Talk Series agiogo



Dimapur, Mongputeni/October 16 (TYO): Fazl Ali College, Mokochung Department of Philosophy-i ayongzüka 5buba Thinking Hat Talk Series October 15 nü College Conference Hall nung agiogo. Iba sentong ya Assistant Professor, Department of Philosophy Dr. Alemtola lenisüba nung agia liasü.

Iba sentong nung shisalen sayurji Clark Theological College, Mokochung nung Professor of Religion, Prof. Rev. Dr. K. Dhanbir Rai liasü, shibai "Philosophy of Bhagavad Gita and its Correlation with Indian Politics and Hindu Fundamentalists" onük nung ajemdaker jembia liasü.

Prof. Rai-i, Bhagavad Gita

indang moral aser philosophical dimension tem indang jembia, aser tanü loktiliba aser yimden yimsüsüba nung koda sendaktepa aliba iba indang lemsatepa liasü.

Sentong nungsa sensaksem ka agi aser iba sülen Associate Professor aser Head of the Department of Philosophy Dr. Bendanginla-i tepela o jembir sentong tembanga liasü.

NCC combined annual training camp tembangogo

Dimapur, Mongputeni/October 16 (TYO): Nagaland (NL) Independent (I) Sainik School Company NCC-i, 2025-26 atema October 6 nungi 15 nü tashi 109buba combined annual training camp (CATC-109) ayongzüka agiogo.

School sangdong ka ajanga ashiba agi, anogo 10 camp akaba mapang cadet tem nem prangbong balala amshitsü training agütsü aser iba den parnok dang prangbong injang balala sayu, prangbong akhatsü sayu, disaster management, süki yanglutsü, mi abentsüba amala sayu aser skill development, cyber security, HIV/AIDS nokdangtsü, first aid amala onük dak sendakba nung tangazükba agüja liasü.

Camp mapang ano drill, volleyball, basketball, arr

atsütepba aser sobaliba sentong balala nung tetoktepba agia liasü, ta kasa sangdong ajanga metetdaksü.

Ajak senteper junior division/ junior wing (JD/JW)- army nungi cadet 95 aser senior division/ senior wing (SD/SW)- army nungi cadet 73 ta cadet 168-i iba camp nung shilem agi. Cadet tem ya Alpha, Bravo aser Charlie ta company asem küma lemsaja liasü.

Maneni associate NCC officer ana, caretaker officer ka den Sainik School Punglwa nungi permanent NCC instructor tem, 1 Air Squadron NCC Dimapur nungi instructor ana aser Assam Rifles nungi instructor anati iba camp nung shilem agiogo.

Camp ajanga cadet tem nem military training, life skill tem aser

pei yimyayimpong azüoktsü atema tangazükba balala agütsüogo, ta kasa sangdong ajanga metetdaksü.

Camp shibangba aser sempet lemtsüba sentong nung Sainik School Punglwa principal, Col. (Dr) Smita Misra-i shilemagi. Iba sentong nung cadet temi sobaliba sentong balala saya liasü.

Sentong nung o jembiba mapang principal-i, camp mapang sentong ajak nung jangrabangra shilem agiba atema cadet tem nem tenüngsang agütsü aser paisa, NCC cadet tem terenlok atema jenjang agiba aser camp kanga takok ngua ayongzüka agiba asoshi NCC staff tem nem tenüngsang agüja liasü.

Camp nung overall best trophy ji Bravo (B) Coy-i agizüka liasü.

Union Minister Naik-i Longleng semdangtsü aliba thinen

Dimapur, Mongputeni/October 16 (TYO): Union Minister of State for Power and New and Renewable Energy, Shripad Yesso Naik-i October 16 nungi 18 tashi anogo asem atema Longleng district semdangtsü aliba thinenogo.

Senior Cabinet Minister aser taoba Goa Chief Minister Ravi Naik asüba sülen iba sentong ya thinenüsüa aküm.

Official sangdong aser Nagaland sorkar Planning department-i ashiba agi, Union

Minister-i Longleng district semdangtsü aliba ya athiba masü saka thinenba dang lir.

Longleng district nung aliba department ajak dang renema alitsü metetdaksüogo, kechiyong anogo melenshiba yakta sangdongtsü imlar.

Union minister-i district semdangba mapang Union sorkar policy densema tongtibang osangtem sangdongtsü aser Longleng district atema terenlok asoshi nükjidong metetdaksütsü imla liasü.

Centre-i Manipur nung sorkar amenoktsütsü: Thounaojam



Thounaojam Shyamkumar

Imphal, Mongputeni/October 16 (Agencies): Manipur BJP MLA Thounaojam Shyamkumar-i ashib agi, November 15 nü state sorkar tasen ka amenoktsü akok, aser chief minister ya centre nung party lenirtemi shimtsü imlar.

Brehostibarnü osangbenertem den sensaksemba mapang Andro MLA yagi ashiba agi, tawa New Delhi nung Manipur nungi BJP legislator tem aser central party lenirtem den sensaksemba mapang tenangzükba agütsüogo.

"November 15 nü sorkar tasen ka kümtettsü. Chief

Minister shiba asütsü aji centre-i telemtetba agütsü. Ajaki iba mapa aginer, saka nibo Centre nem shimdaksüner," ta Shyamkumar-i ashi.

Manipur nungi BJP MLA 26-i linük yimtiba semdangba sülen tang Shyamkumar-i iba olen lemsatepogo.

Party-i lenir melenshiba indang officially sangdonga mali, saka Shyamkumar-i iba olen lemsatepba sülen state nung mapa tongtibangtem melenshitsü akok ta bilemer.

Kasa mapang nung party nung inyakertemi state nung ita aika mepetmesü adoker aruba bentettsütsü atema centre dang akhangba tali küma odar.

Mkg nung Handloom Exhibition tenzükogo



Dimapur, Mongputeni/October 16 (TYO): Nagaland Handloom & Handicrafts Development Corporation Ltd. Narola Alemba Jamir-i Brehostibarnü 11 ako nung lapokja liasü. Exhibition ya October 16 nungi 29 tashi lapoktsü.

Iba Handloom Exhibition ya General Manager (Admin),

Nagaland Handloom & Handicrafts Development Corporation Ltd. Narola Alemba Jamir-i Brehostibarnü 11 ako nung lapokja liasü. Exhibition ya October 16 nungi 29 tashi lapoktsü.

Assam aser Nagaland kübok district balala nungi sütaker aser artisans 60-i iba Exhibition nung shilem agidar, kong handloom, khadi, aser handicraft oset balala sayadar aser iba ajanga NE indang takar sobaliba tali tejangjaba sayur.

Iba Exhibition ayongzüka agiba nükjidong tongtibangtibaji domestic aser export market naprongla nung shishilembatsü atema lenmang lapoka ayutsü atema lir. Maneni iba sentong ajanga artisan aser sütakertem nem shishlembatsü atema maongka agütsütsü meranger, koba ajanga parnok rongsenketzüng jenjang tajungba kümdaktsütsü aser iba den ano handloom aser handicraft sector maneni renloka aotsü asoshi teyari agütsütsü.

Zubeen asüba ken o: SIT-i Singapore ketdangsürtem ajurutsü

Guwahati, Mongputeni/October 16 (Agencies): Assam nunger nungtugu kentener Zubeen Garg asüba ken o dak sendakba nung Assam Police indang Special Investigation Team (SIT) kati October 21 nü Singapore law enforcement ketdangsürtem den sensak asemtsü.

Additional Director General of Police Munna Prasad Gupta-i aniba SIT ya Singapore-i October 20 nü aotsü.

Assam Chief Minister Himanta Biswa Sarma-i iba sentong ya Brehostibarnü social media post ka ajanga jangjatsüogo aser ashiba agi, ochi jangjatsü atema state bendanga agütsür lir.

"ADGP aser SIT tekolakba Munna Gupta-i anir asen team-i Singapore Police den October 21 nü ajuruteptsü. Parnok anogo ka jelia Singapore-i aotsü," ta Sarma-i zülutsü.

Sarma tawa Union External

Affairs Minister S. Jaishankar aser Singapore High Commissioner Alice Cheng den New Delhi nung ajurutepba sülen iba osang ya sangdongogo.

Osangbenertem den sensaksemba mapang Chief Minister-i ashiba agi, Singapore-i iba sensaksem nung shilem agütsü aliba ketdangsürtem aser sensaksemtsüba onüktem meshiogo.

International temzüng ozüng agi alenba ajanga linük ana nungi ketdangsürtem longjemer iba ken o bushisüngdang mesütettsü, saka Singapore-i India nunger ketdangürtem den teka amteper inyaktsü ta Sarma-i ashi.

Paisa, Mutual Legal Assistance Treaty (MLAT) kübok Singapore nunger ketdangsürtemi bushisüngdang nung teyari agütsüdar, ta pai shisem.

Taoba mapang Kenya PM, Raila Odinga Kerala nung asü



October 16, 2025 nü Cochin International Airport, Kochi, Kerala nung Kerala Angh, Rajendra Arlekar-i taoba mapang Kenya Ato kilonser, Raila Odinga nem akhüm agütsüdang tangokba noksa nung angur. Pa Kerala nung ayurvedic treatment tagidak liasü.

New Delhi, Mongputeni/ October 16 (Agencies):

Taoba mapang Kenya Ato kilonser, Raila Odinga, Kerala kübok Kochi district nung lia süogo; pa arrshi küm 80 liasü.

Pa Bodhbarnü Kochi kübok Koothattukulam nung aliba hospital kima jajazüba mapang nung temelungjang tashidak atua tanga hospital kati anir ao saka mekümzü.

Pa tasümangji Brihostibarnü tayimtsü ajanga Kenya-i bener ogo.

Pa 2008 küm nungi 2013 küm tashi Kenya nung Ato kilonser inyaka liasü.

Pa asüba osang angashia Ato kilonser Narendra Modi-i X ajanga, "Kü medemer aser taoba

mapang Kenya Ato kilonser Raila Odinga asüba atema jashir.

Pa ya takutet yimtenren lenir ka liasü aser India atema medemer ka liasü. Ni Gujarat nung chief minister inyakba mapang nungi ni pa meteta liasü. Pai ayurveda aser India nung sobaliba mozütem kanga sapua liasü; item mozü ajanga par jala-a temang tajungba aküm," ta metetdaksü.

Odinga-i mapang shia Kochi yimti tezülen aliba Sreedhareeyam Ayurvedic Eye Clinics & Panchakarma Centre Pvt Ltd semdanga liasü. Par jala Rosemary Odinga (48) dak tekolok nung tumour ajanga 2017 küm tenük mejungi akümba sülen Odinga'er kibongi mapang shia ayurveda eye hospital-i arua

tenük treatment agiba sülen la tenük junga aküm.

Sreedhareeyam nung Director, N.P. Sreejith-i, Odinga den pa kinüngtsü, jala, aianu, pa nija doctor aser security sepai ka liasü, ta metetdaksü.

"Odinga'er kibongji taoba Hokolbarnü Sreedhareeyam tonga aru. Parnoki Mumbai nung aliba allopathic hospital tama semdanga liasü, iba sülen ayurveda treatment agitsü atema pa yagi aru. Pa anepdang jajazüa senzüba mapang nung temelungjang tashidak atua süchia ao. Pa Koothattukulam nung aliba Devamatha Hospital-i anir ao saka anepdang 9:52 ako nung süadok," ta Sreejith-isa metetdaksü.

SC-i EC dang electoral roll nung metokmeperi metongshitsü tuyu

New Delhi, Mongputeni/ October 16 (Agencies):

Brihostibarnü Supreme Court-i Election Commission (EC) dang Bihar nung Special Intensive Revision (SIR) benokba sülen renemba electoral roll nung metokmeperi alibatem metongshitsü tuyuogo.

Justices- Surya Kant aser Joymalya Bagchi nati akümbe bench-i maneni November 4 nüa SIR mapatong dak sendakba ken otem angadangtsü.

Election Commission-i, September 30 nü final electoral

roll sangdongba sülen tenüng agienba dak sendakba nung tashishiba kecha mebenok, ta metetdaksü.

Ajisüaka NGO 'Association of Democratic Reforms' atema ken o jembitsür, advocate Prashant Bhushan-ibo court dang, voter kati final list nung pa tenüng mali ta ashibaji tejangja, aser October 7 nü EC-i metetdaksüba den meputep aser EC-i jembibaji tiyazü, ta ashi.

Pa isa EC dang, inyakyim teladak asütsü atema tenüng kwi agien aser tenüng agentsü

atema kechi telatetbatemsa benokar metetdakjang, ta ashi.

Supreme Court bench-i, Bihar election mezüngbuba shilem kübok aliba constituency tem nung electoral roll nung tashishitsü lira October 17 tashi nung benoktsüla aser election tanabuba shilem kübok constituency tem nung tashishitsü lira October 20 tashi nung benoktsüla, ta metetdakja liasü.

October 7 nü Supreme Court-i EC dang final electoral roll nungi agienba voters lakh 3.66 tenüngji sangdongang, ta tuyua liasü.

 बैंक ऑफ महाराष्ट्र Bank of Maharashtra भारत सरकार का उद्यम एक परिवार एक बैंक	GUWAHATI ZONAL OFFICE 1st Floor, Dwarka Center, Lachit Nagar, Sani Ram Bora Path, Bora Service, Ulubari, G S Road, Guwahati-781007, e-mail: dzmguwahati@mahabank.co.in	
KIOJEN AGIBA NOTICE		
Bank of Maharashtra nung Authorized Officer ka ama tsünglanglen sign süa aliri Securitization and Reconstruction of Financial Asset and Enforcement of Security Interest Act- 2002 aser Sec. 13(12) den Security Interest (Enforcement) Rules, 2002 rule 8 kübok tashi amshia column no.3 nung agüja aliba anogo nung column no.1 nung shia aliba sen apurtem/Guarantors nem Demand Notice agüja Column no. 3 nung shia aliba senotsüji notice nung shia aliba anogo nungi tenzüka anogo 60 tsünga agüjang ta metetdakja liasü. Sen apurtem/Guarantors-i senji magütsüet, anungji sen apurtem/guarantors aser public dang ya sangdonger, tsünglanglen sign süa aliri iba Act nung Section 13(4) aser rule 8 nung aliba tashi amshia 15/10/2025 anogo nung iba kiojenji agiadokogo. Talisa sen apurtem/Company/Guarantors aser Public dang shia aliba kiojen dak sendakba nung kecha inyksangshi masütsü metetdaksür, mesüra shia aliba sen denji külemi sen tetemlokji Bank of Maharashtra nem agütsütsüsa akümtsü. Iba Act nung section 13 kübok sub-section (8) nung ajemdaker sen apurtem dang mapang shidak nung item kiojen alangzüksü metetdaksür.		
(1) Name of Borrower(s)/ Guarantor(s) and Branch Name	(2) Particulars of property/ assets charged	(3) Date of Demand Notice and Outstanding Amount
Borrower: Joseph Enterprise (Proprietor: Mr. Joseph Vero) Guarantor: Mrs. Khropele Vero, W/o Mr. Joseph Vero All residing at: House no. 286/A, Opp. Urban Haat Ward no. 4, Walford Colony, Dimapur, Nagaland- 797112 Branch: Dimapur	All the piece & parcel of plot of land & civil structure measuring 1B-4K-7L covered by Patta no.1404, Dag no. 67/1579 & 147/ 1580 under block no. 11 of Dimapur mouza 1 located at walford area, Opp. Urban Haat, Near Old Dhansiri Bridge, Dimapur, Nagaland- 797112 in the name of Mr.Joseph Vero, bounded by: On the North: Dhansiri River; On the East: Kohima Road; On The South: Plot of Vezovolu; On the West: Plot of Mr. Kerele.	Date of Demand Notice: 01/07/2025 Outstanding Amount: Rs. 15,15,136.00 (Rupees Fifteen Lakh Fifteen Thousand One Hundred and Thirty Six Only) plus future interest as per applicable rate and other charges thereon w.e.f. 01/07/2025
Date: 15/10/2025 Place: Dimapur		
Assistant General Manager & Authorised Officer Guwahati Zone		

BJP-i Bihar election atema party candidates ajak sangdongogo

New Delhi/Patna, October 16 (Agencies): BJP-i Bihar assembly election atema party candidates tenüng ajak sangdongogo.

BJP candidates tasembuba list nungji Nand Kishor Ram (Ramnagar menden), Krishnanandan Paswan (Harsidhi), Murari Paswan (Pirpanti) aser Sangeeta Kumari (Mohania) nunger densema lir. Item mendenji SC atema lemozütsüba mendentem lir. Raghupur menden, Bharat Bind-i Bhabua menden aser Ashok Kumar Singh-i Ramgarh menden nungi tokteptsü.

BJP candidates rongnung kentener Maithili Thakur aser Assam nungi taoba mapang Indian Police Service (IPS) officer Anand Mishra na densema lir. Thakur-i Alinagar menden nungi aser Mishra-i Buxar menden nungi tokteptsü.

Ano tanga osang ka nung, Brihostibarnü Congress lenir Rahul Gandhi aser Congress Tir Mallikarjun Kharge nati RJD tongti, Lalu Prasad dang Mahagathbandhan teloktep

nung party tem tsünga menden lemsaba maparen tekeraba nung tembangtsüla, ta shiogo.

Osang angazükba agi, RJD-i Congress nem menden 52 lemozütsü saka Congress-i menden 61 nung tokteptsü akhang. Ajioda RJD-i Congress menden menden 61 agütsütsü melung, ajisüaka Congress-i tongtibang constituencies kar meshibabo RJD-i magizük. Congress-i Kahalgaon, Narkatiyaganj, Vasaliganj, Chainpur aser Bachwara mendentem nung tokteptsü akhanger.

2020 küm Bihar election nungbo Congress nem menden 70 lemozükja liasü saka menden 19 nung dang takok angu.

Bodhbar aonung Congress-i Bihar election atema candidates list mezüngbuba sangdongogo aser Bodhbarnü RJD lenir Tejashwi Yadav-i Raghupur assembly menden nungi tokteptsü atema nomination file süogo.

Bihar nung assembly elections shilem ana lemsar November 6 aser November 11 anogotem nung agiba sülen November 14 nü votes azüngtsü.



October 16, 2025 nü New Delhi nung Union Minister of Road Transport & Highways, Nitin Gadkari-i Delhi Chief Minister Rekha Gupta den senden amendang tangokba noksa nung angur.

Form No. 3 [See Regulation-13 (1)(a)]	
DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati-781007 (Assam) Case No.: OA/233/2025 Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993. Exh. No.: 5162	
STATE BANK OF INDIA -Vs- M/S T J FOODS COLD CHAIN & Anr.	
To, (1) M/s T J Foods Cold Chain Prop. T. Jemina Jamir, Purana Bazar, Near Sumi Baptist Church, Dimapur, Nagaland-797112 (2) T. Jemina Jamir Prop. of M/s T J Foods Cold Chain, Daughter of Tovishe Sema, House No. 439, Purana Bazar, Purana Bazar A, Dimapur, Nagaland-797116	
JAOKER 12.09.2025 anogo nung Hon'ble Presiding Officer/Registrar matsüngdang OA/233/2025 benoka liasü. Sentsüh Rs. 1,36,96,132.24/- alangzüksü atema iba Act nung section 19(4) kübok application nung ajemdaker na anema (OA) benoka iba Tribunal-i jaoker/notice agütsür (documents densema lir).	
Iba Act nung section 19 kübok sub-section (4) nung ajemdaker na aser defendants dang teküboklen alibatem tuyur :- (i) Iba case defend asürtemi tajaba agütsüba sülen anogo semer nü tsünga relief asoshi mepishibaji kechiba magütsütsüla, iba kulji sayutsü metetdaksür; (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla; (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyksangshitsü memelar; (iv) Security interest atema inyksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyksangshishi masütsüla; (v) Ordinary business ajanga secured assets mesüra tanga assets aser kiojen nungi yokzüksüba senji security interest soita aliba bank mesüra financial institutions indang account nung deposit asütsüla. Nü dang tezülüba nung sangdong applicant nem agütsütsü tuyur aser 24.10.2025 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka teletetba agütsü. 15.09.2025 anogo nung tsünglanglen kü meyongnem den iba Tribunal indang seal agütsür:	
Registrar I/C Debts Recovery Tribunal, Guwahati	



TIR YIMYIM YIMOBILEM (EDITRIAL)

DIMAPUR FRIDAY, OCTOBER (MONGPUTENI) 17, 2025

Sensoi sensolar kümdaktsür

Gari lenmang majungyonga ojang, anasa government mozü ki tajung lapoka makayonga kecha masü, light maruyonga tarem, government school-bo menüngdaker, ozü kinunger vote sen lakh ka agi aliang, ozü telokpur vote sen lakh ter agi aliang, onok tanishirtem nem sen crore ka amuokjang ta election mapang nung jembir aser election kanga sashia agiteper. Aji oda, sensosanger yimkong adenshia senso candidate shimer saka senso-i yaribabo temong maket, pei sensosanger ajak longjemer alar kümdaktsüsüba nisung ka shimer yok amai dang, adok-madok kecha mali, senso candidate ajak alar danga jenjang teküpbokba nung alitsüsa kümdaktsür, kechiyong alarbo sentsü mali saka senso candidate-sangbo takaba ajak yoker külena sentsü matur. Iba tashiji asenoki asen senso tajung ka senso candidate kümdaktsüba agi alar tia dang nungi teküpbokba jenjangi yoker. Tanü asenoki asenok tzüa masen longjemer inyaktetba mapa tulutibaji aji asütsü. Iba mapa jagi asenoki merajemba mapa aika nung asenok takoksa ajurudagi. Item takoksa rongnungji, temulung ashitsüka atalokba otsü aika lir. Aji oda, yashi yakanüang Dimapur nung nisung ka tezüngjang majungba agi dialysis agia treatment agir la alidak Tsemenyuii la kinungbo aser la tedi tenati anir atuba mapang lenmang majungba agi gari ajanga moutet mapang talangka tesem ka nung atatsüsa akümba mapang, la temang mejungi küma adok, anungji lai la temang agi par ki metongtettsüa ta meteta yimtakleni oa aliba to Kohima leni meyipdaksü saka Kohima yimti atongdanga gari onsaraba agi mapang shitak nung mozü ki metongteti laji süa adok. Iba ama tatalokba ya anogo shia asen lima nung tesem ka nung mesüra ka nungbo atalokdar asütsü. Aji oda, asenokia lenmang majungba agi ambulance gari karaa moutet mesüra gari raksar lenmang nung anena adokba agi shiranger temang tamajungba akümba lendong timtem mapang aiben ajurur alitsü. Kasaji, ana nung government mozü ki Primary Health Center danga shitak lapoka ali nungbo mesüra Community Health Center aser District Civil Hospital nung tashidak shitak puteta anepalutettsüsa machine aser nisung ajak shitak alinungbo, senotsüa aika meindok ser tashidak kanga junga aneper kidangi aotsü melen ana nung government mozü ki tajung makaba agi, senotsü aputepa bener oa bendanglen taneptsü mengutet tasü mang bener arurtemji asenok lir. Aji oda, gari lenmang junga alinungbo anema alirtema aser shirangertema melamelaa senzusenpongtsüba ser nung gari lenmang majungba agi anema alirtema totzü nung sen tali oa timtema jajar aser gara kanga raksar. Ajisüaka, asenoki ibaji mazünger aser mangateter. Kasa takoksaji asenoki asenok alidak government school-tem anepalu mesütetba ajanga asen chirnurtem aika zünpeter anenba tebilemtsü ya ka asütsü. Aji oda, asenoki anepalu masüyonga government-ibo akhi ama tesayurtembo shimpet shimdar aser akhi mapang dang nungibo tanü asüng shimba tesayurtemsa tajungba, anungji asenoki parnok denji teraka yaritep nung, tangalen nungia dena asen lima nung government school lapoka alidak azüngi arutsü. Ibaji atalokdaktsüsüsa inyaktsubaji tasak masü saka ana nung dang lir. Atangji, asenoki senso tenüng nung inyakba mapatem ya tangatsübo tajung saka asen lima nung gari lenmang majungba agi len tom nung shiranger tatongtsü ka metongtet asübaaji; tashidakbo tulu masü saka ana nung government mozü ki tajung maliba agi kimonglumong ajak yoka bendanglen taneptsü bushia jajabaji aser tanurtem tokolokbo techira saka ana nung government school tajung lapoka maliba agi, private nunga junga mezüngdaktsütet, tanurbo tajung ser nung takidak maka küma odaktsüba takoksa aser tamakok ajakji asenoki asen senso candidate shimer inyakba anogo nungi tenzüka yangluba lima nung ataloker asütsü. Joko, sensoi senso ka shimer sentsüsür kümdaktsüba mapa yabo anentsüla aser senso ajaki temelenshi ka asoshi pei vote mayoktsüla aser tangar vote malitsüla. Ibaji pei lima yanglushitsü agütsüba tenla tuluka asütsü. Ibai azüjang kata metokshii pei lima peisasa tajungba küma yangluba sentong asütsü.

OLEMSABANG

TANÜ NAGA LIMA LOKTILIBA TENZA TIA ASADANGBA

~ L . Kika Pongener

Mapang tatsüka suiogo, olemsabang nung; "Item tasüngdangba aser telangzüba nung shisadangtsü kar ali asü" ? ta ser kanga tongtipang amai bilemba onuk ishika lemsatepogo. Item onuk-to arokaroka shisadangra; tangatettsü tongtipang karbo lir amai bilemer; aser item onuk-tem jagi tang asen Naga lima tensa tia indang sayur. Anungji iba ocet nung item onuk ajak-to; tanaben khien lepa bener arua tera rajema shisadangnur. Aji oda, ocet-bo ka dang sernung onuk balala meyoktepba asütsü....Saka tanü asen Naga lima tensa tia indang asadanga; ajak-to khien lepa bener arua shisadangnur.

Asen Naga nung nujiso mapa tatempang telemtetba kati arutsüba ya kecha teimla makai kümogo....Oda tang angutsü amai yimla-yimla aser jembia-jembia; nujiso bushir telok (Faction) ya dang tali-tali küma lemsa-a aotsü sudi ta bilemer....Tang tashi nung telok semer (30) dak tali kümogo ta angazüker. Anungji tang nuburtem taginubaji tanga kecha masü; temelen saru (tax) saruba; saru-saji tapu-tapu saruba; pei nuburi pei nubur amokmerenba; aser pua bener aoba; ibala mesukba mapatem yabo anendaktsünur. Ano kanga tesasatsüka, asen Naga nung rongnungi ariana pei sasa mapa tenzüka meranga inyaker (Entrepreneur) lanur kar alinung; parnokji nungita yaritsü melen; telok balalai melentepa temelen saru (Tax) meshiba agi ajungkettsüsü melen atsüzüka yutsür aser rajang kümdaktsür. Ano kanga tongtipang tangatettsü kaji...Shitakbabo Indian army ya asen tsükchir amai tsüba bilemtsüla; aser linuk tenzüker-temjibo pei lima aser nubur atema tenzükertem asünung; nubur ajaki kanga akümtsübuttsüla....Saka tesasatsüka, nuburtemi linuk tenzükertem-ang kangasa atendena tsübur....Anungji linuk tenzükertemji nuburi tsübuttsüsa masü akümtsübuttsüsa alitsüla.

Ano küm shia Hornbill benjong amungdang inyaka beshiba mapatem; benjong nung oa adenertemi jembiba angazükba; tesungmangtsü taoksatsü-kaji....Hotel ajak nung local yi Rice Beer, Rum, Whisky, Beer ajak taluposa ayoker aser jemteper. Aonung arura nuktapangdar aser japujarir tesungmangtsü-ka....!!! Anungji Hornbill benjong ya munga-munga; asen Naga lima ya 'Sodom Gomora' lima mesuka küma aotsü asü (?) ta tsübur. Ano Hornbill benjong den repa; kin shia sobaliba benjong külemi amungba agi; Hornbill benjong yagi kin shia pei pei sobaliba benjong ya mokseptsü tsüba bilemer. Kin shia pei sobaliba benjong yabo pei kin sobaliba aser alu ayimba teka mapa den sendaktepa lir; saka Hornbill benjong yabo tanü putu nung; alima nubur poatsü (attraction) atema puratetba benjong ka dang lir. Ano nuburtem kanga sungmangbaji....Hornbill benjong mapang nungbo "Try State" ozüng ya agiena ayur asü (?) Mesura benjong-bentsü nungbo; yi-ji ayoktsüla aser ajemtsüla ta temzüng-ozüng balaka ali asü (?) ta nuburtem sungmanger...!!!???

Ano asen yimsusurtemi opposition maliba sorkar ka yanglur yimsu asüba yagi; yimsusurtemi atemabo kanga tajung, talisa, sorkar lennir/tokolakba atemabo kanga tajung; kechiba sura pai kechi shidir shingaia mah ta ashir mali; lennir sulenji hau-hai ta tashi anga-a anidaker. Anungji khien ashitsübo, Naga limaji 'Democracy' masü; nisung kati pai mulungba nung yimsu asüba linuk ka ta ashitsü akok. Anungji iba yagi asenoki meyongnem agüja shimtetba yimsusurtemi pei ajungtsü asoshi dang bilemba; aser pei lima aser nubur dang meimba shisatsü khienyongi mali amai parnok mapa jagi sayur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Share the Arrows(STA) conference nung tetsür 6,700 aden



October 11, 2025 nü Dallas, Texas nung aliba Credit Union Texas Event Center nung "Share the Arrows" (STA) conference nung Allie Beth Stuckey-i jembidang tangokba noksa nung angur.

October 16, 2025: October 11, 2025 nü Dallas, Texas nung aliba Credit Union Texas Event Center nung "Share the Arrows" (STA) conference ayongzüka agiogo; iba sentong nung Khristan conservative tetsür 6,700-i Yisu nem tenüngsang agütsüba den külemi Lai azüng aser pei kibong aser linük atema sarasademogo.

Iba sentong ya conservative lenir Allie Beth Stuckey leniba nung agi.

Iba sentong tenzüka Stuckey-i, "Tongbang nung nokdaksü ajak pelaa agizüker, ochi atema rarang, Khristan tamang atema rarang, asen chirnurtem atema rarang aser linük atema rarang," ta ayongzük.

STA sentong ya tang agi tanabenbuba agiogo. Iba sentong ya Charlie Kirk khasetba sülen ita ka shi lir agir.

Osangbener den jembidang Corinth, Texas nungi arrshi küm

28 tetsü ka, Rachael Jonson-i, "Charlie asüba sülen onok melungjang nung ani mesüngzüktetba tanela ka lir, aser onoki iba milak meremsepdaktsütsü. Iba sentong ajanga ajak asüngsashidaktsüogo," ta ashi.

STA sentong nungji Stuckey leniba nung lar medemer asür Charlie nem mokremer akhüm agüja liasü.

Anogo ka conference nungji "Relatable" Podcast host, Jinger Duggar Vuolo, homeschooling "momfluencer" Abbie Halberstadt aser kaketzülur Alisa Childers nungeria shilem agia liasü.

Iba sentong nung o jembirtemi Tsüngrem tsübuba kibong, taküm atema rara aser 'transgender' tangatetba nung lendong keta aliba onüktem jembia liasü.

O jembirtemisa digital putu ka nung Tsüngrem metetba nung tanurtem anitettsü onük jembia liasü.

Share the Arrows (STA) nüngja ya ochi lasang akahba nungi agitetba lir, aser iba oren ya Tenüngsang Ken 127:4 nung shia lir.

Bodhbarnü Abbie Halberstadt-ila indang podcast ajanga, "Laishiba ajanga tanurtem ya lasang den atishitepa lir. Rarar ka ket nung aliba lasangji tanurtem lir. Iba tangatetba nung alima dangi lasang ama tanurtem yoktsü atema tanurtem junga anitettsüla," ta ashi.

Stuckey-i ayongzükba anogo ka conference nungji tetsürtem dang Lai tesayuba nung aliba ama tamang jenjang akanga alitsü ajungshia liasü.

Stuckey-i, "Iba tongbang rara atema Khristan ajak ajar. Iba ya chichiba tongbang raradak raraba masü mesüra moapu ka nung raraba masü saka pei kibongtem, kiyong, school nung mesüra na mapa inyakba tesem nung tanela tongbang raraba indang lir," ta ashi.

Turkey-i security nung ajemdaker bendanger Khristantem nokdanger

October 16, 2025: Turkey sorkari linük security nung ajemdaker linük nungi Khristantem jenti meindoker, ta Legal advocacy group ADF International-i metetdaksü.

2020 küm nungi tenzüka tang tashi nung Turkey nungi bendanger Khristan 200 dak tali meindokogo, ta parnoki metetdaksü.

December 2024 nungi January 2025 tashi nung (ita ana) Turkey nung bendanger Khristantem anema ano ozüng tasen 35 benokogo, iba denji külemi Khristantem tanaben linük telungi aittsü memelar, aser ibaji ajanga Protestant Arogotem nung lenirtem agi anünger, ta ADF International-i metetdaksü.

Tang ADF-i Turkey nung aliba court tem aser European Court of Human Rights (ECHR) nung Turkey nungi Khristantem meindokba anema ken o 30

dak tali benoka lir.

ADF International nung Legal Officer, Lidia Rieder-i, "Turkey nung ket dang ser tem i Khristantemji 'linük security atema amokmeren' ta aitsübaji metetsümonga ozüng tim mesüi amshiba lir aser tamangba yimsü temeden anema inyakba lir," ta metetdaksü.

"Sorkartemi yimsü nung ajemdaker nisung meindoktsü atema administrative mesüra immigration inyakyim melenshibaji ozüng tim mesüi amshiba aser yimsü tsütsü tarezmzüktep maliba agi lir," ta pai metetdaksü.

ADF International-i ECHR nung benoka aliba ken otem rongnung kaji Wiest vrs Türkiye lir. Wiest ya American senso ka aser pa küm 30 dak tali Turkey nung lia aruogo. Pai Turkey linük anema kecha inyaka mali, ajisüaka pa tanaben

linük telungi maitdaktsüba anema ADF International-i Turkey sorkar anema ken o benok.

ADF International-isa, Turkey sorkarisa linük nung Khristantem temeden ajema kümdaktsütsü atema tanga telemtetba balala agia inyaker, ta metetdaksü.

Turkey nung Khristan theological training memelar, Protestant seminaries nem legal temeden magütsür aser Laishiba shisaliok memelar.

Iba dak alia Arogotemi tekülem ki dak sendakba nung timtem balala ajangshir. Turkey nung aliba Khristantem mesüra bendanger Khristantemi kiralongraba tatalokba ka danga mali, ajisüaka Turkey nung left wing teloktem aser Kurdish nationalist temia mapang shia Khristantem anema inyaker.

ANOGO ABEN TSÜNGREM DEN TEMESHIBA BUSHIANG

Kibuba bushiang, nenok alima nung ajemalur ajak, shirnoki pai melabatem inyaker; temeshiba bushiang, ajemaluba bushiang, ashiko Kibuba ain adokba anogo nung nenok miimbangtsü. Zefania 2:3

Alima nung telok balalai pei Tsüngrem dak amanger. Aikati züngzünga aser akang-akanga amanger, aji kanga junger kechiaser amangli amangerbo shiba dak kechi atema amanger jangja meteta kuli süa amangtsüla. Asenok khristantemi Tebu Tsüngrem, Techir Yisu aser Tanela Temeshi dak amanger.

Anitet 15:11, Mosai ken nung ashir, oh, Kibuba na mesük tsüngremtem rongnung shiba ali? Temeshiba nung sentsüwangshi tetsübuttsü ka, Na mesüka tesüngmangtsü sayatenya mapa inyakba nung shiba ali? Maneni Anitet 15:18 nunga ashir, Kibubai teti tatem makai Chubatsü. Iba tesüngmangtsü Tsüngrem dak aseni amanger.

Tanü na aser ni tesüngmangtsü aser tetsübuttsü Tsüngrem shiba kanga dang Temeshi lir, pa dak amanger. Iba Temeshiba lenmang nung jajartem kecha agia malizüktetba temoatsü tulu lir ta angatetdi. Agüja aliba Lai O jagi ashir, ajemalua Pai melaba mapatem inyaka Pa Temeshiba lenmang nung jajartem Kibuba ain adokba anogo nung Pai miimbangtsü. Tetezü, Pa ozüng benshia alirtembo Pai yaritsü. Kibubai asen dak sakloka moatsütsüsa ajemalua Temeshiba lenmang nung jajadi.

Gaza nung putiri züngsemtem dang aibelener dang tai atoktsü mepishi

October 16, 2025: Tang Gaza nung Catholic Arogo ka dang anünga lir, aser iba Arogo nung putir Gabriel Romanelli-i züngsemtem dang aibelener ajak dang tai tokang, ta mepishia metetdaksü.

Tang Israel aser Hamas telok na tsüngda rara anenba sülen Khristan putiri aibelener ajak dang tai atoktsü ayongzüker.

Romanelli-i aniba Holy Family Church nung tamalen Israeli Defence Force (IDF) sepaitemi Arogo nung züngsem ana khasetogo aser IDF indang tank kati Tenla ki raksaja liasü aser iba tatalokba nungjia nisung asem asü.

Israel aser Hamas tsüngda raraba mapang nung Holy Family Church nungia züngsem ajak senteper 57 süogo.

Iba rara piyong Arogoi Khristantem teimba ser nisung 500 tashi jenokdakja liasü.

Taoba ita Israel-i Gaza City toktsür oang ta tetuyuba agüja liasü, ajisüaka putir Romanelli densema Arogo nung lenirtem aser volunteer temi toktsür moui maneni timtemertem yaritsü telemtetba agia liasü.

Taoba Amongnü tekülem sentong nung jembidang Romanelli-i, "Tsüngremi melungba dang süra tang ceasefire tezüngzüktep ya ajanga rara anentsü. Asenoki mapang talangka nungi yongyaa ataba anogo tenzüka yimjung maparen inyaker. Tajung Tsüngremi talisa iba Temeshi Lima, Palestine, Israel nung yimjung lidakjang ta sarasademer," ta metetdaksü.

Paisa, "Rara tenzüka sülen bomb ola mangashiba mezüngbuba Amongnüji iba anogo ya lir. Meteta mesüra memeteti aibelener ajak dang tai tokang aser asen metokmeperitem atema-a Tsüngrem dang tatok meshiang," ta ayongzüka liasü.

Gaza nung rara tenzüka sülen Pope Francis-i mapang shia putir Romanelli aser Holy Family Church den osang metetpelaa aruogo, ajisüaka iba rara matemdang Pope Francis süadok.

Talisa Pope Francis-i pa tasütsü mapang atongtsü anasabo pai anogo shia iba Arogo den tongtepratepa osang metetpelaa aru.

AO OSHI ANGAZÜKDAK:**TANÜ ANGAZÜKTSÜBA OJANG****Tokolo**

(adj) süngjang ano mamen, tamentsü anasa (unripe)
Mamazü aser bolongbo tokolo asü dang aongtsüla.

Tokolok

(n) tokolak telong nung aliba tongti shilem (brain)

* Tokolok chiradaksütsü asoshi kaket azüngtsüla.



Tir Yimyim

OLONG PAITEP # 7302

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasadem dang tembang - (4)
- Tarutsü indang ashitem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anügdang masü - (5)
- Jabaso masü - (4)

OLONG PAITEP # 7301 TELANGZÜBA**TIPIEN :**

- Taa, 3. Teküm, 6. Aibelen, 7. Aut,
- Ajizük, 10. Ojala, 11. Semer,
- Sen, 15. Kioktsü, 17. Itsük,
- Kar.

LANGTSÜNGLEN :

- Tai, 2. Asensor, 3. Tanü, 4. Kua,
- Mitsüktsü, 6. Azübenshi,
- Lah, 9. Jangkak, 12. Akok,
- Nashi, 16. Sür.

NAI-A YA METETTER

Mongolbarnü Hungary den goal 2-2 agütsür tembangba asaya nung Cristiano Ronaldo-i goal ana idakja pa ya FIFA World Cup qualifying puti otsü nung goal timtiba idaktsüba asayar kümogo. Airishi küm 40 tain Portugal nunger asayar yagi Guatemala nunger asayar Carlos Ruiz-i goal 39 idaktsür aliba ajateta tang goal 41 idakja otsü tasen ka yangluogo.

Pradyot-i BJP-i aniba sorkar toktsütsü amokmeren**Agartala, Mongputeni/ October 16 (Agencies):**

Tipra Motha Party (TMP) tekolakba Pradyot Kishore Manikya Debbarma-i, 'Tiprasa' (lisopur) nungertem nem parnok tangutsü tim temeden magütsüra par party-i Trupura nung Bharatiya Janata Party (BJP)-i aniba sorkar toktsütsü ta amokmerenogo.

Bodhbarnü Gomati district kübok Karbook nung party sentong ka nung o jembiba mapang Debbarma-i, 2024 küm March ita Centre aser Tripura sorkar den sign asüba Tiprasa Accord kübok tenangzükbatem indang sorkar nem lephsia metetdaksü.

"Union Home Minister Amit Shah-i, Tripasa nungertem tajangzük aser terenlok atema tenangzüktepba ya benoka inyaksü ta tenangzükba agütsüogo. Ni pa den ajurutepogo aser maparen takaratiba nung benoka inyaksü mepeshia liasü. Ajisüaka asenok temeden angutsü atema kobika atatsü," ta Debbarma-i asügdang.

Züngsem 60 agi kümtetba Tripura Assembly nung BJP MLA 33, TMP MLA 13 aser Indigenous Peoples Front of Tripura (IPFT) MLA ka lir. Iba ajanga TMP ya state nung kanga tongtibang party ka lir.

Maneni Debbarma-i, "onok temeden magütsüra onoki sorkar toktsütsü. Tipra Motha Party ya political lokti tentet ka masü, saka Greater Tipraland asoshi mission ka lir. IPFT-i tashi mesüra temeden kecha monguaka BJP metoktsütsü

akok saka onokbo tatem makabo matatsü," ta ashi.

"Ni meshitsümetür ka masü aser Tiprasa nungera masü. Political party - BJP, Congress, mesüra CPI(M) - kechaia Tiprasa nungertem vote sen agi malizüktettsü. Nonoki merandang yonga ni nokdangtsü," ta Debbarma-i

ashi, shiba Maharaja Bir Bikram Kishore Manikya'er semchir lir.

Arunachal nung 1978 Freedom of Religion Act benoktsü akhangar

Itanagar, Mongputeni/ October 16 (Agencies): Arunachal Pradesh nung sobaliba tamangba yimsü balala dak amangertemi October 18 nü rally ka ayongzuka agitsü sangdongogo. Arunachal Pradesh Freedom of Religion Act, 1978 benoktsü khanga parnok iya rally ayongzuka agitsü.

Indigenous Faith and Cultural Society of Arunachal Pradesh (IFCSAP), shirnoki iya rally ayongzükogo, parnok ashiba agi, iya Act ya tamangba yimsü kar anema masü saka state nung sobaliba tamangba yimsü aser sobaliba senmangtem wazuka ayutsü atema lir.

"Iba Act ya tamangba yimsü kar anema masü. Iba ya tamangba yimsü ajak kümzüka ayutsü aser Arunachal Pradesh nung sobaliba wazuka ayutsü atema lir," ta IFCSAP tir Emi Rumi-i ashiba den, state sorkari mapang talangka mebenoki aliba ozüing ya takaratiba nung benoktsüla ta ashi.

IFCSAP aser Arunachal Pradesh Indigenous Affairs

Council nati Chief Minister Pema Khandu dang, 1978 küm Prem Khandu-i (taoba CM) kechi tenzükogo aji tembangtsütsü mepeshia metetdaksüogo. Iba Act ya taoba Chief Minister Prem Khandu Thungon mapang yanglu asü saka benoka minyaki arudar.

Parnokisa, iya rally ayongzükba nung Bharatiya Janata Party (BJP) mesüra Rashtriya Swayamsevak Sangh (RSS) sendaka mali ta shiogo. Donyi-Polo aser Rangfrak amala yimsü dak amangertemi parnok yimsü aser sobaliba kümzüka toktsütsü atema iya rally ayongzükogo, ta parnok ashia.

Ajisüaka Arunachal Christian Forum (ACF)-i iya ozüing ya anemogo aser ashiba agi, iya yagi telem dang adokdaksütsü aser kar mesenmetui amshitsü. Iba telok yagi ashiba agi, iya Act ya Khristan tem anema lir aser ano iya yagi tamangba yimsü nüjiso anemer.

Chief Minister-i, Gauhati High Court tetuyuba dak ajemdaker iya Act dak sendakba nung state-i ozüing yanglutsüsa akümer ta sangdongba sülen February ita ACF-i longkak aitba sentong ka ayongzuka liasü.

1978 Act nung, tashiyim mesüra ashikelaka nisung ka temulung meyipdaksüba ngutetra senchi achitsü aser tepuokdaki yoktsü ta shia lir.

Iba Act pusemertemi ashiba agi, nüburtem aika temulung meyipba ajanga sobaliba tamangba yimsü amokmerener.

Manipur nung yimtsüing tekolaktemi Indo-Myanmar arrtsü atsüba anemer**Imphal, Mongputeni/ October 16 (Agencies):**

Manipur kübok Chandel district nung Indo-Myanmar arrtsü nung aliba yimtsüing terpezü nungi tekolaktemi tang arrtsü nung atsü atsüba aliba anema ola adokogo aser ashiba agi, parnok litsü nung atsü atsütsü memelatsü.

Külem sangdong ka ajanga yimtsüing tekolaktem yagisa, arrtsü nung atsü atsüyonga aoba ajanga yimdaklirtem mesüingjemteti akümba lemsatepogo. Parnokisa, atsü atsüba ajanga ali, maitsü aser arrtsü nung aliba nüburtem tejangraba dak kongshitsü, ta metetdaksüogo.

"Ken o kanga junga sensak

asemba sülen onoki onok litsü nung atsü atsüba anema nokdaksü bangjemogo," ta kasa sangdong ajanga metetdaksü. Lenirtemisa, arrtsü nung atsü atsüba anema parnok anemaka, Border Roads Task Force (BRTF) mesüra tanga ketdangsürtem kari danga atsü maneni atsüra aji parnok khuret asütsü ta tekümdangtsü metetdaksüogo

Maneni yimtsüing tekolaktem yagi sorkar aser ken o dak sendaka aliba agency tem dang, Kuki-Zo nungertemi Administration balaka akhangba ken o mebenet tashi arrtsü nung atsü atsüba inyakyim anena atatsü mepeshia metetdaksüogo. Yimden

yimsütsüba tsütsü mangatetep aliba ajanga iya tesem nung tensa maneni mejungi lir aser kasa mapang nung sensaksem balala agidar.

Artsü nung atsü atsütsü telemteba agiba ya iya tesem nung alirtemi anema arudar, shirnoki iya ajanga yimtsü arrtsü melenshitsütsü aser international arrtsü nung aliba kinunger aser loktitem piladaksütsü ta tsüba bilemer.

Chandel kübok Indo-Myanmar arrtsü nung ya Kuki-Zo nungertem aika lir. Arrtsü nung atsü atsüba ajanga parnok mesüingjemteti kümogo, aser iya ajanga parnok ali aser arrtsü adener tesendaktep aliba amokmerener ta shia arudar.

Trump-i Venezuela nung CIA nem temelaba agütsüogo

Washington, Mongputeni/Oct. 16 (Agencies): Venezuela linük telung nung miim mapa inyaktsü CIA nem US Tir Donald Trump-i temelaba agütsüogo ta osang ka prokshia aliba pai shidak ta shiogo, anungji South American linük leniri mepelaba lemsatep. Tawa US sepaitemi Caribbean nung temesepba mozü bena lir südi ta temulung melemi aliba rong tem nung ponguben makogo aser idangji nisung 27 tepsetogo. UN-i shimba human rights experts temibo item rong amakba ya "extrajudicial executions" lir ta ashir.

White House nung jembidang, US-i ali nung repranger aser region nung temesepba mozü shibelenba teloktem dak tali amaktsü bilema lir, ta Trump-i ashi.

Nicolás Maduro, shiba taoba küm mangatettep adoka election agüba sülen Venezuela indang tir shidakba masü ta linük balalai ashir, pai TV nung US den yimjung alitsü ayongzüka liasü.

Pai United States nüburtem den jembidang, "rara masü, yimjung" ta ashi.

Region nung US mitkar tali akumba ajanga amaktsü akok ta Caracas nung tetsübo lir. Caribbean nung US sepai 10,000 shi rong tem nung mesüra Puerto Rico (US territory) nung lir ta ashir.

New York Times ajanga ashiba agi, Trump-i temelaba agütsüba ajanga CIA yagi par mulungba nung Venezuela linük telung nung operations agitsü.

CIA yagi Venezuela nung operations agitsü sentong yanglur asü, mesüra item sentong tarutsü atema ayur-ar mejangja, saka iba itdangiterba agency ya South America nung

akhi mapang nungi maparen balala inyakba otsü lir.

Bodhbarnü Oval Office nung FBI Director Kash Patel aser Attorney General Pam Bondi den külemi jembidang, Trump dang New York Times osang indang asüngdanga liasü.

"CIA Venezuela-i aotsü nai kechiba temelaba agütsü?" ta osangbener kati asüngdang.

"Ni kuli ana mechi temelaba agütsü," ta Trump-i langzü, koba US commander-in-chief ka nungi itdangiterba organization inyakyim indang pokbaa telangzüba agütsüba angashia kanga süngmanger, kechiaser yimya agi parnok inyaksangshi teti miimshir.

"Mezüngbuba nung, parnoki (Venezuela) par tepuokdak tesem azüngteta United States of America nung inoktsü."

"Aser kaji temesepba mozü. Venezuela nungi temesepba mozü jenti arur, aser Venezuelan temesepba mozü aika tzüyim ajanga arur, anungji asenoki aji angutsüla, saka asenoki itemji ali nungia anendaktsütsü," ta pai ashi.

Region nung temsepba mozü shibelenba tsütsü Venezuela-i shilem kanga tulubo magir. CIA nükjidong ya Maduro atsüngdoktsüba asü masü ta telangzüba aginüba nung tiri telangzüba magütsü. Maduro tepsettsü asoshi US-i sen \$50m (£37m) agütsütsü sangdonga lir.

"Ni iba tasüngdangba langzütsü ya temenünütsüka masütsü na?" ta pai ashi.

Mongulbarnü US-i Venezuela indang tzükum anasa rong ka nung tenük yoker amakdang nisung trok tepset.

Trump-i pa indang Truth Social nung, iba rong ya narcotics shibelenba rong ka liasü ta itdangiter temi

jangjaogo, ta ashi.

Maduro-i Bodhbbar aonung sangdong ka nung, "Yimli melentsü magizüker, koba ajanga Afghanistan, Iraq, Libya aser linük balala nung tatem makai rara nung tamakok anguba bilemteter," ta ashi.

"CIA-i tasa yanglua sorkar atsüngdokba magizüker."

"Ni ashibang angang, rara masü tesunep, United States nüburtem," ta paisa ashi.

Bodhbarnü Mamduro-i Caracas kübok Petare aser anasa Miranda nung military exercise agitsü totuyuba agüja liasü.

Pai Telegram nung, totzü peria aliba linük kumzüka ayutsü asoshi mitkar, police aser civilian militia tem anidener, ta ashi.

Foreign Minister Yván Gil-ia Telegram nung, United States tiri sangdong khenyongi balaka agütsüba aser raratsü jangraba Venezuela-i magizüker, ta ashi.

"CIA amshiba, aser Caribbean nung mitkar yokba onoki kanga saksalema repranger, koba Venezuela anema tashiyim amshib, amokmerenba aser merenshiba tasa lir," ta pai ashi.

Trump-i Caribbean leni rara nung amshiba rong ti, nuclear-powered submarine ka aser fighter jets tem yoka lir, koba temesepba mozü shibelenba nokdangtsü merangba lir ta White House-i ashir.

US ketdangsür temi Maduro ya Cartel of the Suns ta ajaba lokti nung shilem ka lir, kong Venezuela mitkar tanishir aser security ketdangsürtem dena lir aser parnoki temesepba mozü shibelenba nung shilem agir ta aitsür, koba Maduro-i magizüker.

Russia indang totzü mechi China-i US dang tekum dangtsü ashi

Beijing, Mongputeni/Oct. 16 (Agencies): Russia nungi totzü alia bener aruba mechi Washington-i par mulungba nung Beijing nem sanctions agütsüra onokia tapet mera agitsü, ta Brehostibarnü China-i United States dang tekum dangtsü ashi.

Russia den energy tsütsü shishilempaba ya chichiba aser ozüng agi melaba ama lir, aser US-i par mulungba nung dangar mesüshia aser rongsenketzüng alenba mapa inyaker, koba ajanga global supply chains amokmerener aser international trade rules nung kongshir, ta China-i ashi.

India-i Russia nungi totzü aliba anentsü ta Ato Kilonser Narendra Modi-i shiogo ta US Tir Donald Trump-i shir anogo ka lir Beijing nungi iba tekum dangtsü ya arur. Trump-i China danga India ama inyaktsü ajungshia liasü.

"Modi-i tanü küdang parnoki Russia nungi totzü malitsü ta shiogo. Ibaji mera tulu lir. Tang

China-ia kasaji inyaktsüla," ta Trump-i Washington nung osangbener dang Bodhbarnü ashi.

Ukraine rara nung China tangatetba shidak dang lir, ta China Foreign Ministry odongtar Lin Jian-i ashi.

"Ken o China dak tuluktsüba US inyakyim onoki anema nokdaker, aser par mulungba nung ozüng alema China nem sanctions aser 'long-arm jurisdiction' agütsüba anema nokdaker," ta Lin-i Beijing nungi osangbener den jembidang ashi.

"China indang chichiba temeden aser tejangraba nung timtem agütsüra, onoki ozü sovereignty, terenlok aser security interests kumzüka ayutsü asoshi tapet mera agitsü," ta pai ashi.

Russian fossil fuels timtiba China-i alir aser iba sülen India lir. Russia indang energy exports shilem 60 jungnüa China-i alir ta Centre for Research on Energy and Clean Air (CREA) ajanga

asadangteta lir.

Totzü mechi kisüng masü saka China-i tawa rare earth exports nokdangba mechi tensa mejungi kumer lia iba tekum dangtsü o ya ashi. Iba mineral ya electronics, clean energy aser defence atema kanga tongtipang lir, koba China-i amokbanga lir.

Beijing mera ya US Treasury Secretary Scott Bessent-i aitsü aser China ya tanünga alima anema inyaker aser US-i tembar linüktem den teka amteper telangzüba agütsütsü ta ashi.

China-i iba taitsüba magizük aser rare earth azüokba ya international rules shia aliba ama inyaker aser mitkar temi mashi lenmang nung amshiba nungi nokdangtsü nükjidong nung lir ta ashi.

O tesepra jembiaka China indang Commerce Ministry odongtar He Yongqian-ibo Washington den shishilempaba tebilemtsü jembishinüa bentettsü Beijing mulunga lir ta ashi.

UNGMA IMLANG LONGKUMER
TANUBO SEMCHIR AJANGA SANGDONGER

Mr. Alemzungsang Longkumer S/o Mr. Senukiba Longkumer, Ungma village, Mr. Alemzungsang nem kija aser lokti kari danga senotsü apuja lira aser aputsüra aji ozü kini khuret mabentsü saka pa nija khuret asütsü. Kini memetet pai kimong lumang, jamen süa senotsü apua lira aji kini magizüktsü aser kija-loktii pa nem senotsü aputsüra aji pa nija khuret asütsü. Kini aiben shiaka pai tashi manga, anungji tanü 17th October, 2025 anogo nungi tanubo semchir Ungma imlang kini pa khuret kecha mabentsü ta sangdonger.

Kin tenüng nung:

Aosungkum tatar

Lanumeren tatar

Chungpongreba tatar

Talingangshi tatar

Limasusang tatar

Pakistan aser Afghanistan ceasefire sangdongogo

October 13, 2025 nü Khost nung Afghan Taliban sepai ka military gari ka manung noktaka lir.

Islamabad, Mongputeni/Oct. 16 (Agencies): Pakistan aser Afghanistan na anogo ishika kanga sashia rara linük anaprong nung nisung aika asüba sülen Bodhbarnü ceasefire ka sangdongogo.

Saudi Arabia aser Qatar densema region nung tashi tulu linük temi ayongzüka sülen rara ya anener, kechiaser iba azüdokshi ajanga region nung tensa tamajungba akumtsü tia nung lir, kong Islamic State telok aser al-Qaida asendenshitsü meranger.

Afghanistan-i telungpur telok tem aniteter, ta Pakistan-i aitsür, koba linük yimsüsür Taliban-i magizüker. 2021 küm Afghanistan nung Taliban yimsüsüba aruba sülen Pakistan nunga telungpur temi amakba maziükteti kuma lir.

Pakistan indang Foreign Ministry-i ceasefire ya ghonda 48 atema lir aser Afghanistan-i mepishiba ama inyaker ta ashir. Ajisüaka tongtipang border crossings tem shibanga lir.

Mapang tatsüka lir Taliban sorkar indang odongtar Zabihullah Mujahid-ibo khen asoshi rara anena ataba ta Pakistan-i ajungshiba ajanga lir ta ashir. Pa indang social media post nung ghonda 48 rara anena alitsü indang mashi.

Bodhbarnü Pakistan-i ashiba agi par sepaitemi ammag agi sangwa kuma raraba mapang Afghan security forces aser telungpur aika tepset.

Humanitarian group Emergency NGO, kobai Afghan yimtiba Kabul nung surgical center ka lapoka lir,

parnok dangi linük yimtiba nung apokba sülen nisung tasü mang pongu aser yirur aliba nisung 40 anir aru, ta ashi.

Koba ajanga Kabul nung iba apokba lendong ya atalokar mejangka. Oil tanker ka yangji apokba liasü, koba Taliban-ia jangjatsüogo. Aser Pakistan security ketdangsür anatia par army temi telungpur atsükshia aliba tesem amak ta ashi.

Taliba odongtar Mujahid-i ashiba agi, Pakistan sepaitemi Kandahar province south tsütsü Spin Boldak nung amakdang nok-nü tepongba aser taret amshi aser nisung ter dak tema tepset aser 100 dak tema yiru. Afghan sepaitemi meyiper akhaba nung Pakistan sepai kar tepset, ta Mujahid-i ashi.

Pakistan arütsülen Chaman jila nung alirtemi parnok yimtsüngtem anasa mortars tsükba shia lir.

"Arütsü anasa aliba nüburtem ainshitar," ta yangji alir nisung kati ashi.

Pakistan arütsülen ya 1979 nungi azüdokshia arur, kechiaser iba mapang Afghanistan nung US teyari nung Soviet Union den raradang iba ya frontline state ka akum.

Taoba hopta Pakistan-i arütsülen tayimtsü amshia amakba mapang Afghan civilian 27 - tanur 14, tetsür trok aser tebur tenet - tepsetogo. Tesashitiba ya October 15 nü liasü, aser iba anogo Pakistani fighter jets temi Kabul aser Kandahar nung civilian alidak bomb pokloktsüba nung nisung 17 tepset aser item rongnung tanur toku liasü aser nisung 55 yiru.

27 Buba MDFA Trophy tasemnübuba anogo osang



27 Buba MDFA Trophy 27 Buba MDFA Trophy asayaba noksa nung angur

Mokokchung, Mongputeni/October 16 (TYO)

:Imkongmeren Sports Complex Mokokchung nung tanü 27 Buba MDFA Trophy tasemnübuba anogo mezüngbuba asaya nikongdang 1:00 ako nungi Chargers FC aser Sangpang Riju asaya aser tanabuba asaya KSUM aser Team Gilgal tsüngda asaya liasü.

Tanü Chargers FC aser Sangpang Riju tsüngda mezüngbuba asaya nung asaya

tenzüker minute 7 buba nung Sangpang Riju teloki penalty ka mena nung Chargers FC telok nung J.no-7 Longkai-i iba penalty-ji metsüa goal-1 yok. Iba sülenji asaya or kelen anisüngzükbba mapang agi aser anisüngzükbba mapang agir tanaben ground-i aita asayaba mapang minute 65 buba nung Longkai-isa goal-1 yoka iba goal 2 jagi Chargers FC teloki Sangpang Riju ayong ayonga koka iba asaya tembang.

KSUM aser Team Gilgal tsüngda tanabuba asaya nung asaya tenzüker minute 7 buba nung Team Gilgal telok nungi J.no-9 Kakhevi Assumi-i goal-1 yok aser ano iba sülen Team Gilgal telok nungisa J.no-20 Sentilong-ia minute 29 buba nung goal-1 yocket aser par telok takoklen sür anisüngzükbba mapang tonga liasü. Tanaben telok ana ground telongi aita asayaba mapang minute 42 buba nung team Gilgal telok nungisa J.no-7 J.Dhali-ia goal-1 yocket nung Team Gilgal pur goal-3 agi takok asü, saka minute 45 buba nung KSUM telok nungi J.no-8 Leagin-i minute 45 buba nung goal-1 yocket saka tatemtang mapang tonga adok nung Team Gilgal teloki goal 3-1 agi KSUM kokteta iba asaya tembang.

Noksa Caption

Chargers FC aser Sangpang Riju mezüngbuba asaya mapang tangokba

27 Buba MDFA Trophy

17-10-2025 Finture

1:00 pm Telongjem FC Vs. Intermingla Club

2:30 pm Thunderbolt FC

Vs.Doyang Strikers MKG

Kane Williamson Lucknow Super Giants nung denogo

Mongputeni/October 16, 2025 (Agencies): Lucknow Super Giants kibur Sanjiv Goenka-i sangdong ka ajanga, IPL 2026 metenzük tsüngda taoba mapang New Zealand captain Kane Williamson, club nung Strategic Advisor ama adenba metetdaksüogo.

Lucknow Super Giants nung Rishabh Pant amala nüngtugu asayar densema alima nung asayar tajungtibatem aika dena liaka 2025 season nung parnok tenetbuba nung tembang aser tang team yanglushitsü merangba mapang ka lir. Pant ya taoba season otsüsütsüsa sen crore 27 agi alizüka liasü.

"Kane ya Super Giants nung shilem ka liasü aser shilem tasenba ka agitsü atema pelashishia jaoker," ta Goenka-i X ajanga ashi. "Pa lenisüba, tasa, pai asaya kanga junga angatetba aser asayartem ajungmesotsü atema tashi aliba ajanga pa ya team atema kanga senti kümdaktsür."

TOI-i taoba mapang sangdongba ama Williamson-i

Zaheer Khan melener, shiba taoba season LSG indang mentor liasü. Kane shimba ajanga pai kanga süngjema team aniba aser tasa tajung benoka asayaba ajanga New Zealand team takok tajung nguyonga aoba Goenka-i mapang talangka nungi nükshia aliba sayur.

Arishi küm 35 tain Williamson maneni international cricket asayadar, saka pai franchise balala nung asaya senzütsü atema New Zealand indang central contract magitsü telemetba agia liasü. Pa indang career nung pai Tests 105 nung run 9,276 aser ODI nung run 7,236 yanglua lir, aser pa ya modern cricket nung asayar tajungtiba ka ta züngshir.

IPL nung Williamson Sunrisers Hyderabad nungi küm aika asayaago aser pa lenisüba nung par team 2018 küm final tonga liasü. Iba sülen pa Gujarat Titans nung mapang tatsüka asaya. Tang pa Lucknow nung head coach Justin Langer den asayartem anitetba nung shilem agitsü.

NSF Trophy: Nagaland United SC aser Chedema VYO na final asayatsü



Kohima, Mongputeni/October 16 (TYO): Naga Students' Federation (NSF) aser Angami Students' Union (ASU) nati ayongzüka Indira Gandhi Stadium Kohima nung tang asaya aliba 25buba NSF Martyrs' Memorial trophy nung October 16 nü Nagaland United Sports Club (NUSC)-i Anal Lenruwl Tangpi koka final-i iogo.

Bodhbarnü asaya nung

Nagaland United Sports Club-i goal 4-0 agi Anal Lenruwl Tangpi koka liasü.

Asaya nung Sanathoi-i minute 9 aser 82buba nung goal ana idaktsü aser Jenish aser Joel nati minute 30 aser mapang apuloktsür asayaba mapang goal kaka idakja parnoki asaya ayong ayonga kokogo.

MLA aser General Secretary Nagaland Football Association Benei M Lamthiu

iba asaya patron liasü aser pai player of the match naroküm Arap Konyak nem agüja liasü.

Iba asaya akokba sülen Nagaland United Sports Club pur October 18 nü Chedema Village Youth Organisation den 4:30 ako nungi tenzüka final asayatsü.

Asayamung shibangba sentong nung Deputy Chief Minister, T R Zeliang alakteta jaoker asütsü.

Mongputeni/October 16, 2025 (Agencies): Frenkie de Jong-i FC Barcelona den tenangzüktepba yanglushiogo aser pa 2029 küm tashi club nungi asayatsü ta Bodhbarnü club sangdong ka ajanga metetdaksü.


Iba tenangzüktepba yangluba ajanga club-i iba Dutch nunger midfielder dak tamang katetba sayur, shiba club nung denli nungi midfield nung kanga tongtibang asayar ka lir.

Arishi küm 28 tain Netherlands nunger international asayar ya 2019 küm Ajax nungi Barcelona nung euro million 75 yong aden. Iba mapang pa ya Europe nung lanur asayartem rongnung midfielder tajungtiba ka ta züngshia liasü.

Club nung season tenetbuba asayaba sülen De Jong ya Barça indang asayar tejentiba rongnung ka kümogo aser pai tang tashi nung tetokepba ajak nung asaya 250 nung asayar lir.

Barcelona nungi asayaba mapang club-i 2021 aser 2023 küm La Liga akokba aser Copa del Rey ana akokba nung pai teyari tulu agütsüogo.

Taoba season tem nung yiruba aser tactical tsütsü temelenshi adokba ajanga De



Frenkie de Jong

Jong mapang kar nungbo junga masayateti aruogo, ajisüaka Hansi Flick kübok pa asayar tongtibang ka küma Pedri González den longjemer midfield nung tongtibang shilem agidar.

Barcelona pur rongsenketzüng nung timtema aliba mapang tang De Jong-i iba tenangzüktepba yangluogo, aser Spain nung media osang balala ajanga ashiba agi, pai taa ajemer agitsü mulunga agizükogo, koba 2026-27 season nungi kongshitsü.

Club rongsenketzüng nung kanga timtem adokba ajanga 2022 küm summer transfer window nung pa ayoktsü atema inyaktepogo, ajisüaka asayar yagi masetshi-i nokdang aser pa Barcelona metoktsüi asaya-a takok angutsü tejangraba aliba lemsatapa liasü.

Indonesia-i coach Patrick Kluivert mapa nungi anentsüogo

mongputeni/October 16, 2025 (Agencies): FIFA World Cup 2026 atema qualify mesütetba sülen Football Association of Indonesia-i Dutch nunger coach Patrick Kluivert mapa nungi anentsütsü telemetba agiogo.

Saudi Arabia aser Iraq na makokba sülen Indonesia' team taruba küm World Cup atema qualify asütsü aliba timla samaogo, aser Kluivert shiba nem küm ana atema contract agütsür liasü pa tang mapa nungi anentsüsa kümogo.

"Saudi Arabia aser Iraq na makokba ya agizüktsü kanga

tasak liasü, saka iba ajanga asenok ajak nükjidong koda tulu aji lephsia metetdaksür," ta Kulivert-i ashi.

"Coach ka ama khuret ajak ni abentsü," ta paisa shisem.

Dutch nunger taoba mapang nüngtugu asayar yagi Indonesia team coach mapa ya South Korea nunger coach Shin Tae-yong ket nungi melenzüka liasü. Europe nung Indonesia nungi jakzükertema linük team nungi asayadaksütsü atema Indonesian federation-i jenjang agiba sülen Kulivert ya shima liasü.

Kluivert-i shimba asayar 23 ya timba ka bendanglen aser

talisa Netherlands nung asortem liasü. Ajisüaka coaching setup tasenba kübok result bo kecha balaka memelenshi. Kluivert lenisüba nung Indonesia team-i asaya ti nungi asem dang koka liasü.

"Football Association of Indonesia aser Indonesia national team coaching team-i pa mapa nungi anentsütsü atema officially mulungtepogo," ta federation-i ashi.

"National football coaching aser development program tem kanga junga asadangba sülen iba jenjang ya agiogo," ta PSSI sangdong ajangasa metetdaksü.

BILEMDANGANG

"Shiba tajungba mesüra tamajungba tereprang, nai tajungtiba agütsür magütsür aji nü sasa asüngdangang."